

## Inatsisartut inatsisissaattut siunnersuummut nassuiaatit

**Nassuiaatit nalinginnaasut**1. Siunnersuummut tunuliaqutaasut

Maleruagassat, maannakkut POST Greenlandip ingerlatsineranni maleruagquneqartut nutarterneqarnissaannik kissaateqarneq Inatsisissatut siunnersuummi tunuliaqutarineqarpoq. Allakkerineq pillugu Inatsisartut peqqussutaata kingulliup 2004-mi akuerineqarnerata kingorna allakkanik siararterisarnepur pisariaqartitsiviunera allanngoriartupiloorsimavoq.

Ukiut kingulliit ingerlanerini allakkat annertuumik ikilipput, taamatullu ikiliartornerat ingerlaannarpoq. Assersuutigalugu Danmarkimiit allakkat 2001-imi 337 tonsiusimallutik 2009-mi 185 tonsinut ikilipput, 46%-imik ikileriarlutik. Atortut elektroniskiusut atorlugit qinigassallu allat atorlugit allattarnermik atuinerup annertusinera pissutaasunut ilaavoq. Allakkat ikilinerat sumi tamarmi atuuppoq, taakkunungalua aamma danskit savalimmiormiullu allakkerivii ilaapput.

Poortukkerinermik niueruteqarnermi namminersortunngorsarneqarsimasumi aamma ukiuni kingullerni poortukkat Danmarkimiit nassiuqqartartut 2001-imi 127.000-it missaanniissimallutik 2007-imi 95.000-it missaannut ikileriarput, 26%-it missaannik ikileriarlutik.

Siunnersuummi inatsisit atuuttut eqaannerulernissaat allannguinnissamullu piareersimatinissaat anguniarneqarpoq. Siunnersuutip atuutilerneratigut sullissinermi tunngaviusut, POST Greenlandimit atuutsinneqartussat allanngortinneqassanngillat, kisiannili nalunaarusiornikkut sullissinerit taakku imaannut, kiisalu allakkerinermi sullissinerit ataatsimut maleruagassiornissaannut sukumiisumik aalajangersaasarnepur Naalakkersuisunut isumagissanngortinneqarput. Inatsisitigut tunngavissiorinissaq kissaatigineqarpoq, tassanilu ilaatigut kisermaassisussaatitaanermi ingerlassinissamullu pisussaaffeqarnermi piginnaatitsissutit allanneqarnissaat, taakkulu nalunaarummi, kisermaassisussaatitaaneq ataatsimoortillugu maleruagassiorfiusumi, kiisalu ingerlassinissamut pisussaaffeqarnissamut piunasaqaatinik sukumiisunik takutitsiviusumi ataatsimoortinneqassapput. Sullississutit ullutsinnut naleqqukkunnaartut imaluunniit aningaasaqarnikkut imminut akilersinnaajunnaartut POST Greenlandip sullississutaannit peerneqarsinnaasut Naalakkersuisut aalajangiisinnaalernerat siunnersuummi ajornarunnaarsinneqarpoq. Tamatuma saniatigut sullissinermi iluarsiiisoqarsinnaalernerat siunnersuummi ajornarunnaarsinneqarpoq.

2. Maleruagassat atuuttut

Pilersuineq, angallaneq, allakkanik isumaginninneq il.il. pillugit Kalaallit Nunaannut inatsisip nr. 469-ip, 6. november 1985-imeersup atuutilerneratigut, Kalaallit Nunaannut aamma Kalaallit Nunaanni allakkanik ingerlassinnermut aammalu Kalaallit Nunaanni allakkanik isumaginninnermut maleruagassiorsinnaaneq Kalaallit Nunaanni Namminersornerullutik Oqartussanut nuunneqarpoq.

Danskit allakkeriviata suleqatigineqarnissaa pisariaqartinneqartoq eqqarsaatigalugu Kalaallit Nunaanni Allakkeriveqarneq pillugu Inatsisartut peqqussutaat nr. 5, 8. november 1985-imeersoq danskit allakkerinnermut inatsisaannut naleqquttunngorlugi suliarineqarpoq, tassanilu aalajangersaanermi allakkanik ingerlassinnermut nunat tamat akornanni isumaqatigiissutit annertuumik malinneqarput.

Kalaallit Nunaanni Allakkeriveqarneq pillugu Inatsisartut peqqussutaata nr. 15-ip, 30. oktober 1992-imeersup atuutilerneratigut Kalaallit Nunaata Allakkerivia KNI A/S-imut ilaatinneqalerpoq. Inatsisartut peqqussutaannut nassuiaatini allassimavoq, Kalaallit Nunaata Allakkeriviani annertoq niuernermit tunngaveqarluni niuertarfittut ingerlanneqartoq, kiisalu akit akitsuutillu tunngaviusumik ingerlatseqatigiiffiup aqutsisuunit aalajangersarneqartariaqartut. Tassunga ilassutigalugu allanneqarpoq, akinik aalajangersaasarnermut atatillugu isumaginninnikkut eqqarsaatigisassanik, politikkimik tunngaveqartuinnarnik maannamut aalajangiisoqartartoq ilimagineqartariaqartoq, taamaattumillu nassiussanut pingaaruteqarnerusunut, tassalu allakkanut poortukkanullu, Kalaallit Nunaata iluani aammalu Danmarkimut Savalimmiuinullu nassiunneqartartunut akit suli taamanikkut Naalakkersuisuusunit aalajangerneqartartussaasut.

TELE Attaveqaatit allanngortinneqarnissaa pillugu Inatsisartut peqqussutaata allanngortinneqarnissaa pillugu Inatsisartut peqqussutaata nr. 8-p, 6. juni 1997-imeersup atuutilerneratigut, Kalaallit Nunaata Allakkerivia (maannakkut POST Greenland) KNI Pilersuisoq A/S-imiit nalunaarasuartaateqarnermik ingerlatsivimmut (maannakkut TELE Greenland A/S-imut) nuunneqarpoq.

POST Greenlandimut maannakkut inatsisitigut tunngaviusoq tassaavoq, allakkerineq pillugu Inatsisartut peqqussutaat nr. 8, 14. november 2004-imeersoq. Peqqussutip TELE Attaveqaatit allanngortinneqarnissaa pillugu Inatsisartut peqqussutaata allanngortinneqarnissaa pillugu Inatsisartut peqqussutaata nr. 8, 6. juni 1997-imeersoq taarserpaa, taannalu malillugu Kalaallit Nunaata Allakkerivia (maannakkut POST Greenland) KNI Pilersuisoq A/S-imiit nalunaarasuartaateqarnermik ingerlatsivimmut (maannakkut TELE Greenland A/S-imut) nuunneqarpoq.

Peqqussutip saniatigut aamma POST Greenlandip ingerlatsinera, allakkanik ingerlatitseqqittarnera, allakkanik ammaasarnera aamma allakkanut nakkartitsisarfinnik pilersuineru pillugu Namminersornerullutik Oqartussat nalunaarutaat nr. 6, 14. marts 2005-imeersoq pigineqarpoq.

### 3. Siunnersuutip imarisai

Allakkerineq pillugu Inatsisartut peqqussutaanni maannakkut atuuttumi Namminersorlutik Oqartussat POST Greenland suliassa qarfinni assigiinngitsuni arlalinnik pisussaaffeqartippaat. Peqqussutit taakku peqqussummi atuuttumi amerlassusaat aalajangersimasumik aalajangersarneqarsimapput. Taamaattumik POST Greenlandip allakkerinermi sullissinissamut neqeroorutaanik annikitsunnguanilluunniit iluarsiiarneq annertungaatsiartumik pisariusarpoq, taamaaliornermi allannguutissatut inatsimmik suliaqartoqarnissaa pisariaqartarmat. Siunnersuummi matumani pingaarnertut siunertarineqarpoq POST Greenlandip aningaasaqarneranik kiisalu suliffeqarfinnut assingusunik sullissisunik, soorlu nassiussalerinermik poortukkerinermillu suliaqartunut unammillersinnaassuseqarneranik sukaterinermut iluaqutaasussamik nalunaarusiornikkut ingerlaavartumik iluarsiiinnaanissap periarfissinnissaa.

#### *3.1 Inatsisartut Naalackersuisullu akornanni aalajangiisinnaatitaaffiit.*

Inatsimmi innuttaasut pisinnaatitaaffii eqqornerlunngikkaluarlugit eqaassutsip naammaginatup pigineqarnissaa qulakkeerniarlugu suleriaatsimik toqqaasoqarpoq, Inatsisartut inatsisaanni nutaami innuttaasut inuussutissarsiornermillu ingerlataqartut pisinnaatitaaffii tunngaviusut qulakkeerniarneqarput, nalunaarusiornikkullu allakkerinermi sullissinerit immikkuullarissut maleruagassiorneqarnissaat qulakkeerniarneqarluni. Inatsisartut inatsisaanni Naalackersuisut kisermaassisussaataaneq ingerlassinermilu pisussaaffiit il.il. pillugit maleruagassiorsinnaanissaat erseqqissumik killilerneqarpoq. Naalackersuisut maleruagassiorsinnaanerinut sinaakkusiussani aningaasaqarnikkut mianerisassat sullitanullu tunngaviusut, kiisalu ingerlatsinermi nalinginnaasumi tunngaviusut aallaavigineqartariaqarput.

#### *3.2. Allakkerinermi sullissinerit ataasiakkaat*

Allakkanik tammatsaalisanik aammalu nalingi taallugit nassiussanik, poortukkanik nalingi taallugit nassiussanik kiisalu aningaasat allakkerivikkut nassiussat allagartaannik ingerlassinissamut pisussaaffiit inatsimmit pingaarnermiit peerneqarput. Siunissami suliassa qarfinni taakkunanani ingerlassinissamut pisussaaffiit nalunaarusiornikkut Naalackersuisut aalajangersarsinnaassavaat. Tassunga atatillugu oqaatigineqassaaq Inatsisartut inatsisaanni sullississummut ataasiakkaamut innersuussuteqarnerup peerneqarnerani, sullississutip POST Greenlandip sullississutaanniigunnaarnera toqqaannartumik kingunerissanngimmagu. Sullississut aningaasaqarnikkut imminut akilersinnaappat taanna neqeroorutigineqaannassaaq. Tamatuma saniatigut peqqussummi aviisit ullormut, sapaatit akunnikkaartumik aammalu qaammatikkaartumik saqqummersartunut innersuussuteqarneq peerneqarpoq, pissutigalugu taakkua tunisassiatut immikkut ittutut isigineqarunnaarmata.

Quppersakkat ullormut, sapaatit akunneranut qaammammullu saqqummersartut siunissami allagaannarnut, ingerlassinissamut pisussaaffeqarnermut ilaatinneqartunut ilanngullugit nassiunneqarsinnaassapput. Siornatigut tunisassiat taakku immikkut ittumik akeqartinneqartarput, kisiannili 2009-mi aviisinik nassiussinermut tapiissutit peerneqarnerinut atatillugu allakkat aammalu quppersakkat ullormut, sapaatit akunneranut qaammammullu saqqummersartut immikkoortinneqartarunnaarput.

Aningaasat allakkerivikkut nassiussat allagartaasa amerlassusaat 2005-imi 18.084-iusimallutik, 2009-mi 9.106-inut affaannangorsimapput. Tunisassiap taassuma 2010-mi 5.000-it missaannit atorneqarnissaa naatsorsuutigineqarpoq. Aningaasat allakkerivikkut nassiussat allagartaasa atorunnaarnerisigut ukiumut 500.000 koruunit missaanni sipaarneqassasut naliliisoqarpoq, tunisassiap taassuma suliarineqarnera pingaartumik sulisut nammineerlutik ingerlattartussaammasuk. Naliliineq malillugu qinigassanik atorluarsinnaasunik allanik, soorlu aningaaserivitsigut aaqqiissutinik, tassungalu ilanngullugit netbank-imik imaluunniit allakkerinermi sullissinernik allanik, soorlu allakkanik nalilinnik imaluunniit poortukkanik nalilinnik peqarpoq.

### *3.3 Agguaassinissamut pisussaaffik*

Inatsimmi maannakkut atuuttumi POST Greenland allakkanik agguaassinissamut pisussaaffilerneqarpoq. Naalakkersuisut allakkanik agguaassinermut, taakkununggalu killilersuutaasinnaasunut erseqqinnerusunik aalajangersaanissamut sulii piginnaatinneqassapput. Tamatuma saniatigut illoqarfinni nunaqarfinnilu allakkanik agguaassisoqartassanngitsoq Naalakkersuisut immikkut ittumik aalajangersinnaavaat. Tassani suleriaatsit atuutereersut erseqqissarneqarput, kisiannili maannakkut inatsisitigut tunngavissanik naammattunik peqalerpoq. Naalakkersuisut maleruagassiornerminni ingerlatsinermi aningaasaqarneq sullitanullu tunngaviusut aallaavigalugit piumasaqaataasut aalajangersartariaqarpaat.

### *3.4 Assartuussisut pisussaaffigalugu allakkanik ingerlassisarnerat*

Assartuussisunut allanut akuttoqatigiinnik assartuussisarnermik suliaqartunut nassiussanik nassarnissamut pisussaaffiliisinnaaneq ingerlateqqinneqarpoq.

### *3.5 Niuernermi piumasaqaatit*

POST Greenland allakkerinermi kiffartuussinernut, ingerlassinissamut pisussaaffimmut ilaatinneqartunut niuernermi piumasaqaatinik nalinginnaasunik suliaqartussaasoq ingerlateqqinneqarpoq. Niuernermi piumasaqaatit aamma maleruagassanik aalajangiinernillu, inatsit manna naapertorlugi POST Greenlandimit aalajangersarneqartunik

aalajangiiffigineqartunillu, taamaattorli §§ 5 aamma 21 naapertorlugu aalajangiiffigineqartut pinnagit, imaqassapput. Niuernermi piumasaqaatit tamanit pissarsiarineqarsinnaassapput.

Peqqussummut maannakkut atuuttumut naleqqiullugu allaassutigalugu, niuernermi piumasaqaatit nassuiaatinik aalajangersimanagerusunik sunik imaqassanersut Inatsisartut inatsisaanni aalajangersarneqanngilaq. Kiisalu POST Greenlandip ilitsersuummik suliffeqarfiup iluani atugassamik suliaqartarnissaanut aalajangersagaq maannakkut atuuttoq ingerlateqqinneqanngilaq. POST Greenlandip iluani suleriaatsinut ilusiliinissamut piumasaqaatinik aalajangersaasoqartariaqannginnissaa allannguinnissami tunngavigineqarpoq.

### *3.6 Ingerlassinissamik pisussaaffimmi killilersuutit*

POST Greenlandip illoqarfimmut nunaqarfimmulluunniit qaninnermut nassiussanik ingerlassinissamut taamaallaat pisussaaffeqarnera ingerlateqqinneqarpoq. Taanna agguaassinissamut pisussaaffimmut atasutut isigineqassaaq, taamaalillunilu POST Greenland illoqarfimmut nunaqarfimmulluunniit allakkanik tunniussinissamut pisussaaffeqarpoq, kisiannili ingerlassinissamut pisussaaffeqarneq agguaassinissamut pisussaaffimmik ilaqanngilaq. Agguaassinissamut pisussaaffik § 4-imi immikkut nassuiarneqarpoq.

Siunnersuummi matumani nunaqarfik Pilersuisup Naalakkersuisunut isumaqatigiissuteqarluni pisiniarfimmik imaluunniit nioqqutissanik inuussutissarsiornermullu sakkunik pilersuinermit toqqorsivimmik peqarnissamut pisussaaffeqarfigisaatut, aammalu innaallagissiorfimmik imaluunniit innuttaasunut atugassatut innaallagissamik pilersuiffimmik ataavartumik assingusumik peqartutut, kiisalu aamma akuttoqatigiinnik assartuussiviusutut nassuiarneqarpoq.

### *3.7 Nunanut allanut attuumassuteqarneq*

Post Danmark A/S Kalaallit Nunaata nunanut allanut atassuteqarnerani sinniisuusooq ingerlateqqinneqarpoq.

### *3.8 Akinik akuersisarneq*

Peqqussummi atuuttumi allassimavoq, Kalaallit Nunaata iluani Savalimmiunullu, aammalu Danmarkimut allakkanut nassiussanut akit annertussusaat Naalakkersuisunit akuerineqartussaasoq. Akit annertussusaannut allakkanut poortukkanullu tunngatillugu akuersisarnerup maannakkutut iluseqartillugu atuutsiinnarneqarnissaa siunnersuutigineqarpoq. Quppersakkanut ullormut, sapaatit akunnerannut qaammammullu saqqummersartut akiisa akuerineqarnerat atorunnaarpoq, nassiussat taamaattut nassiussinermi immikkut ittumik akeqartinneqarunnaarlutik allagaannartut poortugaannartullu nassiunneqartalermeta.

Peqqussut atuuttoq aammalu siunnersuut manna malillugu POST Greenland akinut ilusiliussaminik pisariaqartitsineq malillugu allannguissamut sulii qilersorsimaneqanngilaq. Maannakkut akit atuuttut Kalaallit Nunaat tamakkerlugu allakkerinermi assigiimmik atuutsinneqarput, siunissamilu nuna killeqarfinnut, nunap immikkoortuinut ilusiliussanulluunniit allanut aggorlugu ilusiliisoqarsinnaavoq. Tamatumunngalu akuersisussat sulii tassaapput Naalakkersuisut.

### *3.9 Taarsiissuteqartarnermut maleruagassat*

Peqqussummi maannakkut atuuttumi taarsiisarnermut maleruagassat aalajangersimasut atorunnaarsinneqarput. Taakkununga taarsiullugu nassiussat, ingerlassinissamut pisussaaffeqarnermut ilaatinneqartut kinguaattoornerini, tammarninerini ajoquserneriniluunniit taarsiisarnermut Naalakkersuisut maleruagassiornissamut piginnaatinneqarnissaat ilanngunneqarpoq.

Siunissami nassiussanut, ingerlassinissamut pisussaaffeqarnermut ilaatinneqartunut immikkut ittumik taarsiisarnermut maleruagassanik taamaallaat aalajangersaasoqarsinnaalissaaq. Kinguaattoornerup, tammartoqarnerata ajoquseratoqarnerataluunniit saniatigut nassiussanut allanut imaluunniit sulianut allanut taarsiinermi, taarsiinissamut akisussaaffeqarnermut inatsimmi maleruagassat nalinginnaasut malinneqassapput.

### *3.10 Maalaaruteqarsinnaaneq*

Naalakkersuisunut maalaaruteqarsinnaaneq aamma maalaaruteqarnissamut piffissarititaasoq maannakkut atuuttoq atuutiinnassaaq. Nutaatut Naalakkersuisut maalaarutinik suliaqartarnermut aammalu kikkut maalaaruteqarsinnaatitaanersut pillugit maleruagassanik ersarinnerusunik aalajangersaasinnaapput. Maleruagassanik aalajangersaanermi pisortat ingerlatsinerannut inatsisitigut tunngavissat kiisalu taarsiissuteqartarnermi akisussaaneermut maleruagassat nalinginnaasut tunngavigalugit tunngavissarititaasunik Naalakkersuisut aalajangersaasariaqarput. Tamatuma saniatigut § 3, imm. 1, nr. 4-mut innersuussisoqarpoq, tassani nuunat tamat akornanni isumaqatigiissutit taaneqarput. Kalaallit Nunaat ilaatigut minnerpaamik taarsiissuteqartarnermut maleruagassat, the Universal Postal Union-imit aalajangerneqartut malissallugit pisussaaffeqarpoq.

### *3.11 Pineqaatissiisinnaanermut aalajangersakkat*

Pineqaatissiisinnaanermut aalajangersakkat maannakkut atuuttut najoqqutassatigut imarisaat attatiinnarneqarput. Nutaatulli akiliisitsissutit nunap karsianut tutsinneqartarnissaat aalajangerneqarpoq. Inunnut pisinnaatitaasunut piginnaatitaasunullu pineqaatissiisinnaanermut aalajangersakkat ilusiligaanerat Kalaallit Nunaanni pinnerluttulerinermut inatsisit allanngornerisa kingunerisaannik allanngortinneqarput.

Eqqartuussiveqarnerup aaqqissuuteqqinneqarnerata kingunerisaanik suliat Kalaallit Nunaanni eqqartuussivimmi suliarinnittussatut siullertut suliarineqartarnissaat aalajangerneqarpoq.

### *3.12. POST Greenlandip kisermaassisusaaatitaanera*

POST Greenlandip nunap iluani allakkanik, kiisalu allakkanik nunanit allanit nassiunneqartunik ingerlassisarnermi kisermaassisusaaatitaanera maannakkut atuuttoq atorunnaarsinneqarpoq. Tassunga taarsiullugu nassiussat suut POST Greenlandip ingerlassinermi kisermaassisusaaatitaaffigissanerai pillugu maleruagassanik Naalakkersuisut aalajangersaasassapput. Kiisalu kisermaassisusaaatitaanerup annertussusissaasa killilerneqarnerat atorunnaarsinneqarpoq. Taamaattumik siunissami kisermaassisusaaatitaanerup annertussusia annertusineqarsinnaavoq annikillineqarsinnaallunuunniit, taamaalillunilu POST Greenlandip kisermaassisusaaatitaanera maannamut naleqqiullugu annertunerusunngorlugu imaluunniit killeqarnerusunngorlugu Naalakkersuisunit aalajangersarneqarsinnaavoq. Tamatumunnga atatillugu Naalakkersuisut siunnersuummi matumani § 1 eqqarsaatigisariaqassavaat, taamaalilluni POST Greenland suliffeqarfittut kiffartuussivittut, inuiaqatigiit kalaallit allakkerinikkut pisariaqartitaannik naammassinniffiusutut ingerlaannarnissamut periaqarfissaqarnera qulakkeerneqassalluni.

Sumiiffinni tamat tikissinnaasaanni allakkanik nakkartitsivinnik, frimærkinik tunitsiviusunik ilisarnaatinillu atuiffiusunik ikkussuinissamut POST Greenlandip kisermaassisusaaatitaanera atatiinnarneqassaaq.

### 4. Pisortanut aningaasaqarnikkut allaffissornikkullu sunniutissat:

Siunnersuut pisortanut aningaasaqarnikkut allaffissornikkulluunniit sunniuteqassagatinneqanngilaq. Aningaasat allakkerivikkut nassiussat allagartaannik ingerlatitseqqittarnermut pisussaaffik atorunnaarsinneqassaaq, tamatumalu nassatarisaanik POST Greenlandip tunisassiamik neqerooruteqartarnini unitsissinnaavaa. Inuilli tamat qinigassanik allanik, soorlu aningaaserivitsigut nuussisarnermik tamakkiisumik periarfissaqarput. Inuit tamat aningaasat allakkerivikkut nassiussat allagartaannik annikitsumik atuisassappata, aningaaserivitsigut nuussinikkut sipaarutissanik pissarsisoqarsinnaassaaq.

### 5. Inuussutissarsiornermut aningaasaqarnikkut allaffissornikkullu sunniutissat:

Postanvisninginik ingerlatitseqqittarnermut pisussaaffik atorunnaassaaq. Tamatuma nassatarisaanik POST Greenlandip tunisassiamik neqerooruteqartarnini unitsissinnaavaa. Naliliinerli malillugu Kalaallit Nunaanni inuussutissarsiutinik ingerlataqartut aningaasanik nassiussiniarunik qinigassanik allanik periarfissaqarput. Matumani pingaartumik

anigaaserivitsigut aningaasanik nuussisarneq eqqarsaatigineqarpoq. POST Greenlandimiit ilisimatitsissutigineqarpoq, inuussutissarsiutinik ingerlataqartut tunisassiamik atuisutut pingaarnerujunnaarsimasut.

#### 6. Avatangiisinut pinngortitamullu sunniutissat:

Allannguutissatut siunnersuut Kalaallit Nunaanni avatangiisinut pinngortitamulluunniit sunniuteqartussatut nalilerneqanngilaq.

#### 7. Innuttaasunut allaffissornikkut sunniutissat:

Allannguutissatut siunnersuut inuttaasunut ataasiakkaanut allannguuteqartitsisinnaavoq. Nassiussat allagartaannik ingerlassinissamut pisussaaffik atorunnaarsinneqarpoq. Tamatuma nassatarisaanik tunisassiami sullissineq unitsinniarlugu POST Greenland aalajangersinnaavoq. Naliliinerli malillugu Kalaallit Nunaanni inuussutissarsiutinik ingerlataqartut aningaasanik nassiussiniarunik qinigassanik allanik periarfissaqarput. Matumani pingaartumik anigaaserivitsigut aningaasanik nuussisarneq, Kalaallit Nunaanni innuttaasunut tamanut atugassiissutigineqartoq eqqarsaatigineqarpoq, kisiannili aamma aningaasaannarnik allakkatut nalilittut imaluunniit poortukkatut nalilittut nassiussisinnaaneq eqqarsaatigineqarluni. Tamatumunnga atatillugu oqaatigineqassaaq, anigaaserivitsigut nuussisarneq postanvisningikkut nassiussisarnermiit akikinnerujussuimmat.

#### 8. Naalagaaffeqatigiinnermut atassuteqarneq:

Kalaallit Nunaata namminersulerneranut atatillugu Kalaallit Nunaanni Namminersorlutik Oqartussat aamma Naalagaaffimmi oqartussaasut akornanni attaveqatigiinnermi iluarsisooqarpoq. Kalaallit Nunaanni Namminersorneq pillugu inatsimmi nr. 473-imi, 12. juni 2009-meersumi (namminersorneq pillugu inatsimmi) § 16, imm. 1 naapertorlugu Namminersorlutik Oqartussat pisussaapput, isumaqatigiissutit aammalu nunat tamat akornanni maleruagassat sukkulluunniit Naalagaaffimmut atuuttut malissallugit. Isumaqatigiissutit taamaattut namminersorneq pillugu inatsimmi § 13, imm. 4 naapertorlugu Naalakkersuisusunut oqaaseqarfigisassanngorlugit saqqummiunneqartarnissaat piumasarineqarpoq. Taassuma atuunneratigut POST Greenland pisussaavoq nunarsuarmi allakkerinermi isumaqatigiissummi, Kalaallit Nunaata inissisimaffia apeqquataatinnagu Danmarkip akuerisimasaani allannguutit malissallugit.

Tamatuma saniatigut inatsimmi imaluunniit Naalagaaffeqatigiinnermut pingaaruteqartunik allannguisoqassanngitsoq naliiisoqarpoq.

#### 9. Tusarniaaneq

Siunnersuut manna illuatungiliuttunut ukununnga tusarniaassutigineqarpoq:



Air Greenland A/S
Arctic Umiaq Line A/S
Inuussutissarsiormut Suliffeqarnermullu Naalakkersuisoqarfik
Aningaasaqarnermut Naalakkersuisoqarfik
Aalisarnermut, Piniarnermut Nunalerinermullu Naalakkersuisoqarfik
Nunamut Namminermut, Pinngortitamut Avatangiisinullu Naalakkersuisoqarfik
Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfik
Isumaginninnermut Naalakkersuisoqarfik, taassumalu ataani tappiitsunik soqutigisaqartut
Peqqissutsimut Naalakkersuisoqarfik
Diskoline A/S
Kalaallit Nunaanni Sulisitsisut Peqatigiiffiat
Kalaallit Nunaanni Eqqartuussiviit
KANUKOKA
KANUNUPE
KNI A/S
Unammilleqatigiinnermik Nakkutilliisoqarfik
Naalakkersuisut Siulittaasuata Naalakkersuisoqarfia
Nunatsinni Advokatit
NUSUKA
Kalaallit Nunaanni Politimestereqarfik
POST Greenland
Rigsombudsmandi
Royal Arctic Line A/S
Aatsitassanut Ikummatissanullu Pisortaqarfik
SIK
Siunnersuisoqatigiinnut Ataatsimiititalianullu Aqutsisoqarfik
TELE Greenland A/S

Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfimmit, Peqqissutsimut Naalakkersuisoqarfimmit, Aatsitassanut Ikummatissanullu Pisortaqarfimmit kiisalu Kalaallit Nunaanni Rigsombudimit tusarniaanermut akissuteqaatinik tigusaqartoqarpoq, taakkualu tamarmik allapput siunnersuut oqaaseqaateqarnissamut pissutissaqalersitsisimangitsiq.

Sulinermik Inuussutissarsiuteqartut Kattuffiat (SIK) allannguuteqartitsinissamik pissutissaqalersitsinngitsunik akuersaartumik tusarniaanermut akissuteqarpoq.

KANUNUPE-mit tusarniaanermut akissuteqaat imatut imaqartoq tiguneqarpoq:

*Nunaqarfiiit peqatigiiffiata tusarniaaneq pillugu ataatsimeereernerani tusarniaanermi najoqqutassat annertunerpaartaat tusaatissatut tiguneqarpoq, aammalu makkuninnga siunnersuummut oqaaseqaatissaqarluni:*

*§ 4, imm. 2-imut atatillugu allakkat poortukkallu nunaqarfinni tiguneqartarnerisa akuttussusaata minnerpaamik sapaatip akunneranut ataasiarluni pisarnissaata qulakkeerneqarnissaa pisariaqartutut isigaarput, taamaalilluni allakkat nunaqarfinnut apuuttarnissaat qulakkeerneqassammat.*

Tassunga atatillugu oqaatigineqassaaq KANUNUPE-mit kissaatigineqartutut sullissinermut piumasaqaatinik atuutsitsilernissaaq pisinnaasimanngimmat. POST Greenland allakkanik assartuinnermut atorneqartussanik nammineerluni angallateqanngilaq, kisiannili umiarsuit aamma qulimiguullit nassiussanik ilaasunillu nalinginnaasunik angallassinermut atatillugu atorneqarsinnaasut atortariaqarlugit. Nassiussanik pilersuinerit il.il. allaanerusut sapaatip akunneranut ataatsimit akulikinnerusumik akuttussuseqartinneqartussaataapput, taamaattumik pisussaaffiup taassuma annertusineqarnissaanik POST Greenland pisussaaffilerneqarnissaa pisinnaangissorineqarpoq imaluunniit naleqqutinngitsuusorinarluni. Assartuussinissamut pisussaaffik attatiinnerneqarpoq, tamannalu POST Greenlandip suliffeqarfittut Namminersorlutik Oqartussanit pigineqartutut sapinngisani tamaat naammassiniartussaavaa. Tamanna peqqussummut atuuttumut naleqqiullugu allannguutaanngilaq, tassani aamma illoqarfinnut imaluunniit nunaqarfinnut sullissinerup minnerpaaffeqarnissaanik aalajangersaasoqanngimmat.

KANUKOKA-mit tusarniaanermut akissuteqaat tiguneqarpoq, taassuma siunnersuut iluarisimaarppaa pingaartumillu missingiutip kingulliup tusarniaassutigineqarnerata kingorna allannguutit suliarineqarsimasut eqqarsaatigalugit. Kommunit marluk immikkut tusarniaanermut akissuteqaateqarnissartit toqqarsimavaat, tassani Qeqqata Kommuniata makkua erseqqissarusussimallugit:

- *Allakkerineq pillugu Inatsisartut inatsisissaattut nutaatut siunnersuummi innuttaasut aamma inuussutissarsiortut tunngaviusumik pisinnaatitaaffiisa qulakkeerneqarnissaat.*
- *Inatsisip nutaap pisortanut pitsaanngitsunik imaluunniit allaffissornikkut sunniuteqannginnissaa.*

Kommuneqarfik Sermersooq tusarniaanermut akissuteqaateqarpoq, taanna nalunaarutissami aalajangersakkanuinnaq tunngassuteqarluni.

**Aalajangersakkanut ataasiakkaanut nassuiaatit**

## § 1-mut

Aalajangersagaq maanna peqqussummi atuuttumi § 1-imik ingerlatitseqqinneruvoq. Tassani POST Greenlandip suliffeqarfittut kiffartuussivittut, inuiaqatigiit kalaallit allakkerinikkut pisariaqartitaannik naammassinniffiusutut, kiisalu suliassanik allakkerinermi sulianut nallersuunneqarsinnaasunik ingerlatsivittut siunertaasut pingaarnertit ingerlatiinnarneqarput.

## Imm. 1-imut

POST Greenland TELE Greenland A/S-ip ilagigaa aalajangersakkami aalajangersarneqarpoq.

## Imm. 2-mut

Aalajangersakkami POST Greenlandip suliassai nassuiarneqarput. POST Greenlandip inuiaqatigiit kalaallit Kalaallit Nunaanni allanik nassiussinissamut pisariaqartitaasa matussusernissaat pingaarnertut suliassarigaa aalajangersakkami aalajangersarneqarpoq. POST Greenland annertunerpaamik niuerneramik tunngaveqarluni ingerlanneqassasoq aalajangersakkami aalajangersarneqarpoq. POST Greenlandip sullissineri pingaarnertut aningaasaqarnikkut imminnut akilersinnaassasut, tassalu isertitat aningaasartuutitut nallersuussinnaassasut tassani pineqarpoq.

Niuernikkut eqqarsaatigisassat saniatigut eqqarsaatigisassat allat akinik aalajangersaanermi aalajangiisuusinnaanissaat aalajangersakkami ammaanneqarpoq. Tamanna pingaartumik sullissinernut pingaarnernut atuutissaaq.

Suliffeqarfiup annertunerpaamik niuerneramik tunngaveqarluni ingerlanneqarnissaata kingunerisaanik aamma POST Greenland isumalluutunik pioreersunik pitsaanerpaamik atorluanaanissamik anguniagaqassaaq, aammalu isumalluutunik atorluanerup pitsaanerpaanissaanut pisariaqartinneqartumik pitsanngorsaasassaaq, naleqqussaasassaaq ingerlatsinermillu oqilisaassisassalluni, kiisalu sullitat pisariaqartitaat aningaasaqarnikkullu akilersinnaassuseq eqqarsaatigalugit sullissinernik, kiffartuussinernik sullississutinillu ingerlaavartumik naleqqussaasassalluni.

## Imm. 2, nr. 2-mut

Suliffeqarfik kiffartuussiviusoq paasineqassaaq tassaasoq aningaasartuutit sapinngisamik annertunerpaamik isertitanut nallersuunneqarsinnaassasut. POST Greenland sullitanut

akilersinneqartussaangitsunik immikkut ittunik suliakkerneqartillugu, aningaasartuutit suliakkiisup akiliisinniarnertigut matussuserneqarsinnaapput.

Imm. 2 nr. 3-imut

Inuiaqatigiit kalaallit ineriartornerat naapertorlugu suliassanik nutaanik POST Greenland tiguserusukkuni, suliassanik aaqqiinissaq allakkeriviup suliassanut allatigullu aningaasaqarneranut uniuutinnigippat tamanna pissaaq. Suliassat isumannaatsumik, pitsaasumik aammalu sullitat pisariaqartitaat eqqarsaatigalugu kiffartuussinernut sullissinernullu ingerlaavartumik naleqqussaannermut naleqquttumik ingerlanneqassapput.

## § 2-mut

Imm. 1-mut

Ingerlassinissamut pisussaaffik tassaavoq, POST Greenlandip nalunaarusiaq malillugu Naalackersuisunit peqquneqarluni illoqarfimmut nunaqarfimmulluunniit qaninnermut allakkerinikkut sullissinera. Tassalu nassiussinissaq eqqarsaatigalugu qinigassaqartitsisoqanngilaq.

Imm. 2-mut

Aalajangersagaq maannakkut peqqussummi § 2, imm. 2-imik oqaatsitigut allannguuteqartinneqarluni ingerlatitseqqinneruvoq. Aalajangersakkami aalajangersarneqarpoq POST Greenland niuernermi piumasaqaatinik nalinginnaasunik suliaqassasoq. Taamaattorli § 5 naapertorlugu sullissinernik peqarpoq, POST Greenlandimut sularissallugit peqqussutaanngitsunik.

Imm. 3-mut

Aalajangersakkami niuernermi piumasaqaatit pissarsiarineqarsinnaanerat pineqarpoq. Tassani niuernermit piumasaqaatit ilusissaannut piumasaqaatinik aalajangersaasoqanngilaq, kisiannili niuernermi piumasaqaatit sullitanit tamanit pissarsiarineqarsinnaassapput, soorlu quppersakkanik naqitanik allakkerivinni tamani saqqumitinneqarsinnaasunut pissarsiarineqarsinnaasunillu suliaqarnikkut. Tamatumunnga atatillugu oqaatigineqassaaq, taanna innuttaasumut atuutsitsinissamut aalajangersagaanngimmat, imaalilluni paasissutissinneqannginnermi niuernermi piumasaqaatit allannguutaat atuuttussaassanatik. Allannguutip atuutilerneranut ulluliussa Naalackersuisut aalajangiineranni takuneqarsinnaassaaq.

Imm. 4-mut

Aalajangersagaq maanna oqaasertamigut allannguuteqartinneqarluni peqqussummi atuuttumi § 2, imm. 4-mik ingerlatitseqqinneruvoq. Namminersornerup atuutsinneqalenera pissutigalugu taaguutinik atuinermi allannguisoqarpoq. Niuernermi piumasaqaatini annertuumik allannguisoqarnissaanik eqqarsaateqartoqarpat Naalackersuisut siumoortumik ilisimatinneqassapput. Tamatumunnga atatillugu Naalackersuisut TELE Greenland A/S-imik piginnittuunertik atuuttoq aqputigalugu sunniuteqarsinnaapput.

### § 3-mut

Aalajangersagaq nutaajuvoq, tassanilu POST Greenlandip ingerlassinissamut pisussaaffiinik Naalackersuisut aalajangersaasinnaanerinut maleruagassiani killiliussassat aalajangersarneqarput. Ingerlassinissamut pisussaaffiup imarpiaa, tassungalu ilanngullugu POST Greenlandip nuna tamakkerlugu allakkerinikkut sullissinerni piumasaat malillugu allakkanik ingerlassinissamut pisussaaffiisa qanoq annertutiginnissaannik aalajangersakkat nalunaarummi aalajangersarneqartussanngorlugit nuunneqarput. Taamaattorli sullissinerni tunngaviunerpaaq – tassalu illoqarfimmut nunaqarfimmulluunniit qaninnermut nassiussanik tigusinissamut assartuinissamullu tunngasoq – suli inatsimmi § 3, imm. 1 nr. 2 naaportorlugu inatsisinik tunngaveqartinneqarpoq.

#### Imm. 1, nr. 1-imut

Aalajangersakkami sullissinerit ataasiakkaat suut nassiussinissamut pisussaaffimmut ilaatinneqassanersut pillugu Naalackersuisut aalajangiinissamut piginnaatinneqarput. Tamatumunnga atatillugu sinaakkutissanik, POST Greenlandip inatsimmi § 1-imik naammassinninnissaanut ajornarunnaarsitsisussanik peqarnissaa Naalackersuisut qulakkiissavaat. Tamatumani piumasaqaatit attuumassuteqartut tassaassapput aningaasaqarneq kiisalu sullissinermi tunngavissat. Taamaattorli aamma inuiaqatigiinni isumaginninnermilu eqqarsaatigisassat Naalackersuisut pingaartissavaat. Tamatumunnga atatillugu allakkanik nassiussinermi kalaallit inuiaqatigiit pisariaqartitaasa qulakkeerneqarnissaasa eqqarsaatigineqarnissaa aningaasaqarnermit pingaarnerutinneqarsinnaavoq, tak. § 1, imm. 2, nr. 2.

#### Imm. 1, nr. 2-mut

Aalajangersakkami POST Greenlandip nassiussanik aalajangersimasunik nassiussinissamut itigartitsisinnaanermut periarfissaqarnera inatsisitigut tunngavissiuunneqarpoq. POST Greenland nunarsuarmi allakkerinnermut isumaqatigiisummi (Universal Postal Union) allakkanik ingerlatitseqqittarneq pillugu nunanut ilaasortaminut pisussaaffiliussatut aalajangersagai malillugit allaffissornikkut sullissinennaassappat, inatsisitigut tunngavissaq taanna pisariaqarpoq. Allakkanik ingerlatitseqqittarneq tassaavoq, allakkanik nassiussinermut akit assigiinnigissutaat, aammalu nunat tamat akornanni nunat akunnerminni akiligassatigut aaqeeqatigiiffiginnaasaat atorluarniarlugit allakkat Kalaallit Nunaannut

nassiunneqartussanngorlugit agguanneqartussanngorlugillu nunami allami tunniunneqartut. Siunnersuutip atuutilerneratigut nassiussisut Kalaallit Nunaanni najugaqartut, nunami allami nassiussinermut akit iluanaarnarnerusut iluaqutiginiarlugit allakkanik qaatiguuliukkanik, nunatsinni ingerlateqqitassatut tunniunneqartunik tunniutsinneqartunilluunniit nassiussinissamut agguassinissamulluunniit POST Greenland pisussaaffeqarunnaassaaq. Tassani allakkanik ingerlateqqitassanik angallassineq pineqarpoq.

Naalackersuisut nalunaarusiornermikkut nunarsuarmi allakkerinermut isumaqatigiisummi maleruagassat malillugit qanoq annertutigisumik allakkanik qaatiguuliukkanik, nunanit allaniit nassiunneqartunik, allakkatut ingerlateqqitassatut pasinartunik, POST Greenlandip qanoq annertutigisumik itigartitsisinnaanissaanut ersarinnerusunik maleruagassiussapput.

Imm. 1, nr. 3-mut

Kalaallit Nunaanni illoqarfinni nunaqarfinniluunniit tamani allakkerinermi sullissiveqarpoq, taakkunanilu allakkerinermi sullissiviit, allakkanik aallertarfiit kiisalu tunniussisarfiit atorneqarsinnaapput. Tassani allakkeriviit, atortut elektroniskiusut atorlugit aaqqiinerit, aammalu aaqqiinerit, sullissisut allat suleqatigalugit pilersinneqartut eqqarsaatigineqarput. Aalajangersakkami innuttaasut tamatigut allakkanik tunniussivissaqarnissaat allakkerinermilu sullinneqarsinnaanissaat qulakkeerniarneqarpoq. Sumiiffiillu taakku allakkeriviusariaqanngillat.

Imm. 1, nr. 4-mut

Tassani POST Greenlandip Universal Postal Union-ip (UPU), aammalu nunat tamat akornanni isumaqatigiisutit tungaannut pisussaaffii aalajangersarneqarput. Siunnersuut Universal Postal Union-ip (UPU) isumaqatigiissusiaanut, nunarsuarmi allakkeriviit akornanni pissutsinut tunngavigineqartumut tunngatillugu kalaallit inatsisaannut naleqqussagaavoq. Universal Postal Union (UPU) FN-ip ataani suliniaqatigiiffiuvoq. Nunarsuarmi allakkerinermi isumaqatigiisut Danmarkimit, taamaalillunilu aamma Kalaallit Nunaanni akuerineqarsimavoq.

Imm. 1, nr. 5-imut

Aalajangersakkami tunngavissinneqarpoq, POST Greenlandip nassiussat assartuussinissamik pisussaaffimmi pineqartunut ilaatinneqartut kinguaattoorneranni, tammarnaranni imaluunniit ajoquserneranni taarsiissuteqarnissamut pisussaaffeqarnera pillugu maleruagassanik Naalackersuisut aalajangersaasinnaapput, tassani ilaalluni taarsiissuteqarnerit taamaattut annertussusissaat. Tunngaviusumik nunarsuarmi allakkerinermi isumaqatigiisummi maleruagassat naapertorlugit taarsiissuteqartoqartarpoq. Maleruagassat taakkua taamaalillutik allakkanut killissanut qaangiisunut tunngatillugu atorneqassapput. Isumaqatigiisummi nassiussanut, nunap killeqarfiisigoortunik akisussaaffinnut killiliussat nalinginnaanngorsakkat

atorneqarput. Nunarsuarmi allakkerinermi isumaqatigiissummi nunat ilaasortaasut akornanni taarsiissuteqarnissamut akisussaaffiit maleruagassiuunneqarput. Nunarsuarmi allakkerinermi isumaqatigiissummi periaatsit pingaarnertut ukuupput:

Nunat ilaasortaasut pingaarnertut nassiussanik tammartoqartillugu, nassiussanik tammatsaaliukkanik, poortukkanik nalinginnaasunik aamma allakkanik sillimmasikkanik tillittoqartillugu imaluunniit ajoqusertoqartillugu taakku nassiussanik taamaattunik nassiussinermut malittarisassat naapertorlugit tunniunneqarnissaasa tungaanut taarsiisussaataasarput.

Taamaattorli nunat ilaasortaasut immikkut ittumik pisoqartillugu, nassitsisup tungaaniit kukkusoqartillugu sumiginnaasoqartilluguluunniit, nassiussap imaa pissutaalluni, imaluunniit nassiussisoq peqquserlulluni nassiussap nalivia sinnerlugu sillimmasiisimatillugu nunat ilaasortaasut taarsiisussaataaneq ajorput. Allakkat nunat killeqarfii qaangerlugit nassiunneqartussat tamarmik "Office of Exchange"-mik (OE) taasaq, immikkut ittumik isumaqatigiisuteqarneq tunngavigalugu pilersinneqarsimasoq malillugu nassiunneqartarput. Ataatsimut isigalugu allakkeriviit allakkat OE-mut isumaqatigiisutaasumi tiguneqarnissaasa tungaanut allakkanut akisussaasuupput, tassunga assartuussineq ilaatinneqarluni. Kalaallit Nunaannit nassiussat tamarmik Danmark aqqusaartussaavaat. Danmarkimut nassiussat, tassungalu ilanngullugu Savalimmiunut nunanullu allanut nassiussat timmisartukkut nassiunneqartut Kastrup-imi OE-qarput, kiisalu umiarsuakkut nassiussat Aalborg-imi OE-qarlutik. Nassiussaq ersittumik ajoqusersimappat, imaluunniit imai tamarmiusut ilaannaasulluunniit annaaneqarsimasut ersittumik uppersarsineqarsinnaappat, tamanna EO-mit nalunaarsorneqassaaq, tassanilu POST Greenland akisussaasuussaaq. Tunngaviusumik uppersarsaasiinissamut apeqqut sullissivimmi tassaniippoq, tassanilu allakkeriviit akuutinneqartut akornanni oqaloqatigiinnermik aallartitsisoqassaaq. Taamatut suleriaaseqarnermut nassiussat amerlasuut nunat killeqarfiinik aqqusaarinnittarnerat, taamaalillunilu akisussaaffik pillugu apeqqummik paasiuminaallisitsisarnerat tunngavigineqarpoq. Siullermik nunap nassitsiviusup taarsiissutissanik naammassinnittarnera ileqquuvoq. Nuna tiguisoq akisussaasutut pissusilersorsimappat, nuna nassitsisoq aningaasanut akilikkaminut nunap tiguisup taarsiissuteqarnissaanik qinnuteqarsinnaassaaq. Matumani POST Greenland nunatut nassitsisutut uppersarsaasussanngussaaq. Tunniussineq nunami pineqartumi nunap iluani aalajangersakkat malillugit pisimappat, aammalu tiguisineq apeqquteqartitsinani tiguisussamit eqqortumit tiguneqarsimappat, POST Greenland nalinginnaasumik nassiussanut akisussaajunnaartussaavoq. Tunniussinissaq sioqqullugu imaluunniit tunniussinermi ajoqusertoqarsimasoq imaluunniit imaanik tillittoqarsimasoq paasineqarpat akisussaaffeqarneq atorunnaassanngilaq. Allakkanik poortukkanillu nalilikkanik tiguisoq tiguisinermi kingunitsianngua akerliliissuteqarpat akisussaaffeqarneq atorunnaassanngilaq, tamatumani ajoquserneq tunniussinissaq sioqqullugu pisimasoq uppersarsarneqarsinnaappat.

Imm. 2-mut

Ingerlassinissamat pisusaaffeqarnej pillugu aalajangersakkanik ersarinnerusunik aalajangersaasinnaanissamat Naalackersuisut periarfissaqarput, tassanili POST Greenlandip sullissinerisa pingaarnert inatsisiliunneqarnissaat kissaatigineqarsimavoq. Taamaattumik nassiussanik tigusinissamat aammalu illoqarfimmut nunaqarfimnulluunniit qaninnernut nassiussinissamat pisusaaffeqarnej Inatsisartut inatsisaanni allanneqarpoq. ”Illoqarfimmut imaluunniit nunaqarfimmut qaninnermut” killiliinermi POST Greenlandip illoqarfimmut nunaqarfimnulluunniit ingerlassinissamat pisusaaffeqarnera pineqarpoq, kisiannili agguaassinissamat pisusaaffik aalajangersakkami allami immikkut sammineqarpoq, tak. § 4.

Siunnersuummi matumani nunaqarfik sumiiffittut, Pilersuisup Naalackersuisunut isumaqatigiissuteqarnej tunngavigalugu nioqqutissanik ulluinnarni atugassanik inuussutissarsiornermilu sakkussanik pilersuiffiusunik pisiniarfeqarnissamat pisusaaffeqarfigisaatut, innaallagissiorfeqartutut assigisaanillu innuttaasunut sarfamik pilersorneqarnerini ataavartussamik aaqqiiffiusutut, kiisalu aamma assartuinikkut akuttoqatigiinnik sullissivilerneqarsimasutut nassuiarneqarpoq.

Imm. 3-mut

§ 3, imm. 1 naapertorlugu allannguisoqarnerani tusarniaanissamat pisusaaffeqarnej inatsisitigut aalajangersarneqarpoq. Tamanna maannamat ileqqusimavoq. Suliap nammaqatigiilluni ingerlanneqarnissaata pingaaruteqassusia, taamaalillunilu oqartussaasut, inuussutissarsiortut kiisalu innuttaasut sunniteqarsinnaanissaat erseqqissarniarlugu aalajangersagaq ilanngunneqarpoq.

§ 4-mut

Aalajangersagaq maannakkut peqqussummi § 4-mik allannguuteqartinneqarluni ingerlatitseqqinneruvoq. Kisiannili najoqqutassat imaat suli agguaassinissamik pisusaaffeqarnermut sinaakkusiisuupput.

Imm. 1-imut

Aalajangersakkami Naalackersuisut allakkanik nalinginnaasunik agguaassinissamat maleruagassanik aalajangersaasinnaanerat ingerlateqqinneqarpoq. Aalajangersakkami allakkat nalinginnaasut agguaanneqartarnerat, soorlu allakkanik agguaassinissamat pisusaaffeqarnej allakkanillu agguaassisarnerup akulikissusissaa qanoq annertutigisumik atuutsinneqassanersut Naalackersuisut pingaarnernik maleruagassiornissaamat periarfissinneqarput. Tamatuma kingorna maleruagassat taakku qanoq iliorluni naammassineqassanersut POST Greenland ersarinnerusumik aalajangiissaaq. Assersuutigalugu allakkanik agguaassisarnerup qasseriarluni (akulikissuseq) pisarnissaa Naalackersuisut aalajangersinnaavaat, tamatumalu kingorna POST Greenlandip ullut allakkanik agguaassiffissat aalajangersimasut aalajangersinnaallugit.



Tamatumunnga atatillugu Naalakkersuisunut, sullitani tunngavissanut ingerlatsinermilu aningaasaraqarnermut eqqarsaatigisassanut tunngavissat attuumassutillit atuutsinneqarput.

Siunnersuummi matumani, POST Greenland A/S-ip illoqarfinni nunaqarfinnilu agguaassisarnerata annertussusaanut tunngatillugu maannamut pisussaaffigisimasaanik annertusititsinissaq siunertarineqanngilaq.

Imm. 2-mut.

Aalajangersagaq manna atorlugu nunaqarfiit agguaassinissamut pisussaaffimmut tamarmiusumut ilaatinneqannginnissaannut ersarissumik inatsisitigut tunngavissiisoqarpoq, tamannalu maannamut suleriaatsimi atorneqarsimavoq. Aammalu nunaqarfik naammattumik sullitanut tunngavissaqarfiulersimappat kiisalu agguaassinissap tunngavissaqalernissaanut aningaasassaqarpat, nunaqarfiit ataasiakkaat agguaassisussaatitaanermi pineqartunut ilaatilernissaat tunngavissilluarneqarpoq.

Imm. 3-imut

Aalajangersakkami tassani tunngavissinneqarpoq, agguaassisarnissap attatiinnarnissaanut sullitanut naammattumik tunngavissaqanngippat imaluunniit aningaasassaqanngippat, Naalakkersuisut illoqarfiit ataasiakkaarlugit agguaassinermi ilaatingissinnaagaat. Tamanna Naalakkersuisunut qinnuteqarnikkut pissaaq, taakkualu tamatuma kingorna immikkut ittumik akuersissuteqarsinnaapput.

#### § 5-imut

Aalajangersagaq maannakkut peqqussummi § 5-imik ingerlatitseqqinneruvoq. Aalajangersakkap atuutilerneratigut POST Greenland siunertaasoq malillugu nassiussanik allanik sullissinissamik aalajangersinnaalissaaq, tak. siunnersuummi § 1, imm. 2, tassanilu ingerlassinissamik pisussaaffilerneqartariaqanngilaq. Tassunga atatillugu "nassiussat allat" paasineqassaaq tassaasut sullississutit ingerlassinissamut pisussaaffiliiffiunngitsut. Aamma POST Greenlandip suliassat allat, sullissinerminut ilaaginnarsinnaasut ingerlateqqissinnaavai, taakkunungalugu assartuussinermik suliaqartunut allanut suleqatigiinnissamut isumaqatigiissusiorsinnaaneq, kulturikkut aaqqissuussinernut, angallavinni angallassinernut assigisaannullu bilitsinik allakkerisarfitsigut tuniniaasarneq. Taamaattumik oqaaseq "suliatsullissinermut ilaaginnartut" assigiinngitsorpassuarnut tunngatinneqarsinnaavoq.

Imm. 2-mut

POST Greenlandip nassiussanik allanik sullissinissamut imaluunniit sulianik allanik suliaqarnissamut aalajangiineri § 2, imm. 2 naapertorlugu niuernermit piomasagaatinut nalinginnaasunut allanneqarsinnaapput, tamannali piomasagaataangilaq.

#### § 6-imut

Aalajangersakkap ilaa peqqussummi maanna atuuttumi § 8-mut naleqqiullugu nutaajuvoq. Namminersornerup atuutsinneqalenera pissutigalugu taaguutinik atuineri allannguisoqarpoq. Aalajangersakkanik unioqutitsineri Kalaallit Nunaanni pinerluttulerinermit inatsit malillugu akiliisitsissuteqarnissaq pineqaatissiisutaasinnaavoq, tak. § 23.

#### Imm. 1-imut

Aalajangersakkami nassiussani aalajangersimasuni POST Greenlandip kismaassisussaataitaanissaanut, aammalu kismaassisussaataitanerup imaanik aalajangersaanissamut Naalakkersuisut periarfissinneqarput. Tamanna POST Greenlandip nuna tamakkerlugu nassiussanik ingerlassinissamut qulakkeerisussaataitanerata kinguneraa. Kismaassisussaataitaneq POST Greenlandip allakkerineri inuiaqatigiinnut pisussaaffinik naammassinninnissaanik qulakkeerisussaatanerata naammassineqarnissaanut pisariaqartinneqartunit annerusariaqangilaq. Inatsisartut inatsissaanni matumani POST Greenlandip kismaassisussaataitanerata annertusineqarnissaa, imaluunniit allaffissornikkut suleriaatsit maannakkut atorineqartut allannortinneqarnissaat siunertarineqangilaq.

Aalajangersakkami peqqussummi maannakkut atuuttumi § 13, allakkanik nakkartitsivinnut tunngasoq ingerlateqqinneqarpoq. Inatsit atuaruminarnerulersinnialugu aalajangersakkat kattunneqarput. Siunnersuummi aamma POST Greenlandip tamat tikissinnaasaanni allakkanik nakkartitsivinnik ikkussuisinnaanermi kismaassisussaataitaanissaanut Naalakkersuisut periarfissinneqarput. Allakkanik nakkartitsiviit aalajangersakkami matumani atorineqartut tunngavigalugu nassuiaasarneqarput, tassalu POST Greenland aqqusinersuarni, aqqusineri sumiiffinnilu allani tamat tikissinnaasaanni katersuivinnik ikkussinissamut kismaassisussaataitaassaaq.

#### Imm. 2-mut

Katalogit, naqitat paasissutissiat, aviisit aamma atuagassiat, nassiussallu allat assigiiartunik naqitanik imallit qaatiguuliukkat poorlugit POST Greenlandip saniatigut allanit agguanneqarsinnaanissaat aalajangersakkami aalajangersarneqarpoq. Taakku akimmut ersittunik, soorlu plastfolianik pooqarnissaat piomasarineqarpoq. Katalogit, naqitat paasissutissiat, aviisit aamma atuagassiat, nassiussallu allat assigiiartunik naqitanik imallit qaatiguuliukkat nassiussatut puukkatut iluseqartilernagit qitequtaasalerneqarsinnaapput, qilerneqarsinnaapput assigisaanillu iliuuseqarfigineqarsinnaallutik.

Imm. 3-mut

POST Greenlandip kisermaassisuuneranut maleruagassat tusarniaassutigineqartarnissaat aalajangersakkami erseqqissarneqarpoq. Tusarniaasarneq inatsisitigut aalajangerneqartoq taanna soqutigisaqartut kalluarneqartussat illersorniarlugit ilanngunneqarpoq.

#### § 7-imut

Aalajangersagaq maanna peqqussummi § 14-imik ingerlatitseqqinneruvoq.

Aalajangersakkap atuutilerneratigut POST Greenland frimærkinik saqqummersitsisarnermi kisermaassisuusaaq. Tassani kortini, allakkat puuini assigisaaniluunniit atortut POST Greenlandimit imaluunniit POST Greenland sinnerlugu sullissisunit namminersortunit suliarineqartut atorlugit frimærkinik naqitsinerit allatulluunniit nassiussinermut akiliutitut naqitsinerit pineqarput. Aalajangersakkamik unioqqutitsisoq Kalaallit Nunaannut pinerluttulerinermit inatsimmi § 23 naapertorlugu akiliisussanngortinneqarluni pineqaatissinneqarsinnaavoq.

#### § 8-mut

Aalajangersagaq oqaatsitigut allannguuteqartinneqarluni maannakkut peqqussummi § 12-imik ingerlatitseqqinneruvoq. Namminersornerup atuutsinneqalernera pissutigalugu taaguutunik atuinermi allannguisoqarpoq.

Aalajangersakkap atuutilerneratigut POST Greenlandip ilisarnaataa akuerineqarsimasooq Naalackersuisut akuersiteqqaarnagit allanit atoqqusaanngilaq. POST Greenlandip ilisarnaataa tassaavoq ilisarnaatitut atorneqartoq. Aalajangersakkamik unioqqutitsisoq Kalaallit Nunaannut pinerluttulerinermit inatsimmi § 23 naapertorlugu akiliisussanngortinneqarluni pineqaatissinneqarsinnaavoq.

#### § 9-mut

Aalajangersagaq maanna peqqussummi § 15-imik ingerlatitseqqinneruvoq.

Aalajangersagaq allakkanik isertuussisinnaanermut nipangersimasussaataitaanermullu maleruagassanik imaqarpoq. POST Greenlandimi sulisut, aammalu § 14 naapertorlugu ingerlassinermik suliaqartut nipangersimasussaataitaasut aalajangersakkami erseqqissarneqarpoq. POST Greenlandimi sulisut, imaluunniit aamma § 14 naapertorlugu ingerlassinermik suliaqartut allakkat allakkerinermit sullissinernik atuinerat pillugu susassaqqanngitsunut ilisimatitseqqusaanngillat, imaluunniit paasissutissanik taamaattunik nammineerluni pissarsiniarluni periarfissarsioqqusaanatik. Nipangersimasussaataitaneq

taanna atornerqarnerup ingerlanerani imaluunniit isumaqatigiissutip atorunnaarnerani ingerlaannassaaq. Aalajangersakkamik unioqutitsisoq Kalaallit Nunaanni pinerluttulerinermut inatsimmi § 23 naapertorlugu akiliisussanngortinneqarluni pineqaatissinneqarsinnaavoq.

#### § 10-mut

Aalajangersagaq oqaatsitigut allannguuteqartinneqarluni peqqussummi maannakkut atuuttumi § 16-imik ingerlatitseqqinneruvoq. Namminersornerup atuutsinneqalernera pissutigalugu taaguutinik atuinermi allannguisoqarpoq.

#### Imm. 1-mut

Aalajangersakkami allakkanik POST Greenlandimit ingerlanneqartunik sumunnarfilerneqarsimasunik, aammalu allatut iliorluni nassitsisumut tiguisussamulluunniit apuunneqarsinnaangitsunik qaqugukkut ammaanissamut misissuinissamullu periarfissiisoqartassanersoq maleruagassiuunneqarpoq. POST Greenlandip nassiussamik iluani kinaassutsimik uppersititsiviusinnaasumik ujarlertoqarsimangippat imaluunniit POST Greenland-ip allatut iliorluni nassuissisoq imaluunniit tiguisussaq aalajangiussinnaanngikkuniuk, nassiussaq ammassavaa misissussallugulu.

Allaffissorneq eqqarsaatigalugu nassiussat apuunneqarsinnaangitsut ammarneqarnissaasa tungaanut piffissarititaasoq sivikinnerpaaffilerneqanngilaq. POST Greenland nassiussamik nassitsisumut imaluunniit tiguisussamut apuussinissamut paasissutissanik naammattunik nassaangippat, nassiussaq siunnersuummi 17, imm. 1 naapertorlugu nassiussaq apuunneqarsinnaangitsutut suliarissavaa.

Nassiussamik ammaasinnaanermut killiliunneqartut iluanni maleruagassanik erseqqinnerusunik aalajangersaasinnaanermut piginnaatitaaneq POST Greenland-imiippoq.

Tassani innuttaasut piginnittuunissamut pisussaaffiannut, tunngaviusumik inatsimmi § 72-imi illersorneqartumut akulerunneq pineqarpoq. Innuttaasup nassiussamik tigusinissamut pisariaqartitsinera pingaartinnerullugu tunngaviusumik inatsimmi § 72 saneqqunneqarsinnaavoq. Taamatut periarfissaqartitsinissaq naleqquttut isumaqarfigineqarpoq, taanna atuutinngippat nassiussaq tiguisussamut imaluunniit nassiussisussamut apuunneqarsinnaanngimmat. Taamaattumik suliani taamaattuni tunngaviusumik inatsisini siumoortumik eqqartuussisut aalajangiisarnissaannut piumasaaqatit saneqqunneqarsinnaanissaat immikkut pisariaqartinneqartoq.

Aalajangersakkami nassiussat sumunnarfilerneqarsimasut tamarmik pineqarput.

#### Imm. 2-mut

Eqqarsaatigisassat imm. 1-ip ataani allassimasut ajoqusikkat annertussusiannik aalajangiiffiginarlugit nassiussanik ammaasinnaanermut atuutsinneqassapput.

Imm. 3-mut

Kikkut nassiussanik ammaasinnaanersut misissuisinnaanersullu pillugu Naalakkersuisut sukumiisunik maleruagassiorsinnaassapput, tassungalugu tamatumunnga atatillugu allakkanik isertuussisussaaneermut tunngassuteqartut ilaatinneqarput, tak. siunnersuummi § 9.

#### § 11-mut

Aalajangersagaq maanna peqqussummi § 17-imik ingerlatitseqqinneruvoq.

Imm. 1-imut

Aalajangersakkap atuutilerneratigut POST Greenlandip niuernermit piomasagaatini nalinginnaasuni nassiussat qanoq issusissaannut, nassiussat ataatsimoortut ataasiakkaat killissaannut, kiisalu nassiussat allakkatut ingerlanneqartussatut tiguneqartarnerinut piomasagaatinut maleruagassanik sukumiisunik aalajangersaassaaq. Maleruagassanik sukumiisunik aalajangersaanermi maleruagassanik, § 3 naapertorlugu ingerlassinissamut pisussaaffimmik takorlooruminaallisitsisunik POST Greenland maleruagassiussanngilaq, soorlu ilusissaannut oqimaassusissaannulluunniit piomasagaatinik naammaginangitsunik aalajangersaanermigut.

Imm. 2-mut

POST Greenland aamma nassiussap qanoq ilinerani allakkatut ingerlateqqitassatut ingerlateqqinneqarsinnaannginneranut maleruagassanik niuernermit piomasagaatini nalinginnaasuni aalajangersaassaaq. Nassiussat ingerlateqqitassatut ingerlateqqinneqarsinnaanngippata, soorlu nassiussat pigisanik siaruarterneqarnissaminnut inerteqqutaasunik, inuussutissanik asiujasunik, timmissanik, uumasunik miluumasunik pulateriaarsunnillu uumasunik, inerteqqutaasutut isikkoqartunik, mamiatsannartunik ajuallannartunilluunniit, ingerlaneqarnerminni ajoquisiinnaasunik imaluunniit inunnut atortunulluunniit assigisaanullu ulorianartorsiortitsisinnaasunik annertuumillu akornutaasunik imaqartunik. Taagorneqartut pineqartunut tamanut matusinngillat.

#### § 12-imut

Aalajangersagaq maannakkut peqqussummi § 18-imik ingerlatitseqqinneruvoq.

Aalajangersakkap atuutilerneratigut POST Greenlandip qinnuigineqarnermini poortukkanik, nassiussanik tammatsaalisani, nassiussanik nalinga nassiussanullu allagartalerlugit nassiunneqartunut akiliutigineqartut aningaasartaat allallugit nassiunneqartunik tunniussisoqarnera uppersarsassavaa. Taanna nassiussap ingerlateqqitassatut POST Greenlandip tiguneqarneranut uppersarsaatitut atorneqassaaq.

#### § 13-imut

Aalajangersagaq maannakkut peqqussummi § 19-imik ingerlatitseqqinneruvoq.

Aalajangersakkap atuutilerneratigut POST Greenland niuernermit aalajangersakkani nalinginnaasuni nassitsisup allakkanut tunniunneqareersunut nalunaarutigineqareersunulluunniit qanoq annertutigisumik oqartussaananut maleruagassiussaaq. Tamatuma nassatarisaanik nassiussat aallartinneqareersut imaluunniit nassiussat aallartinneqanngitsut eqqarsaatigalugit nassiussap utertinneqarnissaanut imaluunniit tiguisissup saniatigut allamit tiguneqarnissaanut nassitsisup piunnaarsinnaanera qanoq annertutigissanersooq maleruagassiorneqassaaq.

#### § 14-imut

Aalajangersagaq oqaasitigut allannguuteqartinneqarluni maannakkut peqqussummi § 20-mik ingerlatitseqqinneruvoq. Namminersornerup atuutinneqalernera pissutigalugu taaguutini atuinermi allannguisoqarpoq.

#### Imm. 1-imut

Assartuussisup angallaviini allakkanik ingerlassisarnissamik POST Greenlandip assartuussisunut nammineq piunnaarsitsimik isumaqatigiissuteqarsinnaasooq aalajangersakkami aalajangersarneqarpoq. POST Greenland-ip ingerlassineq taanna isumaqatigiissutaasut naapertorlugit akilissavaa.

#### Imm. 2-mut

Immikkut pisoqartillugu pisariaqartinneqarpat, Naalackersuisut assartuinermit suliaqartut nassiussanik ingerlassinissamut pisussaaffimmut ilaatinneqartunik nassaqqullugit peqqusinnaavaat, assartuinermit suliaqartut taakku Kalaallit Nunaata nunataani imaluunniit Kalaallit Nunaanniit Danmarkimut, Savalimmiunut nunanulluunniit allanut akuttoqatigiinnik, aammalu POST Greenlandimut qinnuigineqarlutik assartuussisarpata.

Assersuutigalugu isumaqatigiissutinik atuuttunik atorunnaarsitsinerit, imaluunniit nutaamik isumaqatigiissuteqarnissamut isumaqatigiinnissamilli angusaqarfigineqarsinnaanngitsunik pisariaqartitsinerit pisutut immikkut ittutut isigineqassapput. Taamaattoqassappat

piumasaqaataassaaq, assartuussisartup pineqartup allakkanik nassartarnissaanik pisussaaffilernissaa, sumiiffimmi pineqartumi allakkanik tiguisinnaanissamut nassiussisinnaanissamullu pisariaqartoq.

Assartuussisartup allakkanik nassartarnissaanik pisussaaffiliineq pillugu aalajangernermi piumasaqaatit, § 1-imi siunertamut aalajangersagaq naapertorlugu Kalaallit Nunaanni allakkanik ingerlassisarnermik qulakkeerisussat Naalackersuisut aamma pingaartittariaqarpaat. Akuersarneqarpoq allakkanik nassartarnissamik pisussaaffilerneqarneq akuliunnertut misigineqarsinnaasoq, kisiannili illersuinissamik eqqarsaateqarnissaq inatsisip siunertaani allassimasoq naammassiniarlugu aalajangersagaq ilanngunneqarpoq, taamaalillunilu tamanna Kalaallit Nunaanni allakkanik assartuussinermik isumaginninneq, assartuussisartut ataasiakkaat eqqarsaatigineqarnissaannit pingaarnerusoq takussutissaavoq.

Imm. 3-mut

Ingerlassinermut, tassungalu ilanngullugu allakkat nassiussanut allanut naleqqiullutik salliutinneqartarnissaannut, akiliisarnermut aammalu allakkat ingerlanneqarneranni akisussaasut kikkuunerinut atugassarititaasussanik erseqqinnerusunik aalajangersaanissamut Naalackersuisut piginnaatinneqarput. Ingerlassinerit akilerneqartarnissaannik imm. 2 naapertorlugu aalajangersaarnerni allakkanik assartuussinissamik pisussaaffilerneqartumut akuliulluni iliuuseqarneq pineqartoq Naalackersuisut eqqarsaatigisariaqarpaat. POST Greenland ingerlassinermut akiliisassaaq.

#### § 15-imut

Aalajangersagaq maanna peqqussummi § 21-mik ingerlatitseqqinneruvoq.

Aalajangersakkap atuutilerneratigut POST Greenland niuernermit piumasaqaatini nalinginnaasuni nassiussat tunniunneqartarnerinut aalajangersakkanik erseqqinnerusunik aalajangersaassaaq, ilanngullugit illunut agguaanermi piumasaqaatit minnerpaaffissaat, ilanngullugit nassiussat suut tiguisussap postboksianut immikkoortinneqartassanersut, nassiussat suut allakkerivimmut aaneqartassanersut, kiisalu inoqutigiinnut agguaanissamut piumasaqaatit minnerpaaffissaat.

#### § 16-imut

Aalajangersagaq oqaatsitigut allannguuteqartinneqarluni maannakkut peqqussummi § 22-mik ingerlatitseqqinneruvoq. Namminersornerup atuutsinneqalernera pissutigalugu taaguutinik atuinermi allannguisoqarpoq.

Tamatuma saniatigut imm. 2-imi allannguisoqarpoq.

## Imm. 1-imut

Illuni ilaqutariinnut ataatsinut inissiani aamma illuni uiguleriinni allakkanik nakkartitsisarfinnik ikkussuinissamut, kiisalu inissiarsuarni allakkanik ikisisarfinnik ikkussuinissamut maleruagassanik Naalakkersuisut aalajangersaassapput, ilanngullugit allakkanik ikisisarfinnik allakkanillu nakkartitsivinnik ikkussuinissamut, atuinissamut, inissiinissamut, ikkussinermi tulleriaarinissamut kiisalu allakkanik nakkartitsisarfiit matukkullu allanik nakkartitsisarfiit angissusissaannut piumasagaatinut maleruagassat.

## Imm. 2-mut

Inoqutigiit allakkanik ikisisarfinnik ikkussuinissamut aalajangersakkat naammassisimangippasigit, POST Greenlandip inoqutigiit taakkua allakkanik agguaasarnermi minissinnaavai. Taamatut pisoqartillugu allakkat piffissami aalajangersimasumi allakkerivimmut aaneqarsinnaallutik uninngatinneqassapput. Inatsisip iluarsaanneranut matumunnga atatillugu innuttaasut pisinnaatitaaffiisa, tamanna ajornartinnagu, pitsanngorsarneqarnisaat kissaatigineqarsimavoq. Siusinnerusukkut allakkerivimmiititaq minnerpaamik sapaatip akunnerani ataatsimi uninngatinneqartussaasimavoq. Tamanna piffissamut aalajangersimasumut allanngortinneqarpoq, tamatumani aalajangersakkap minnerpaaffissatut annerpaaffissatullu aalajangersakkatut nassuiarneqannginnissaa, taamaalillunilu allakkerivimmiititap taamaallaat sapaatip akunnerani ataatsimi uninngatinneqannginnissaa qulakkeerniarlugu. Piffissaq sivisunerpaamik qanoq sivisutigissanersoq taamaalilluni ataasiakkaatigut naliliiffigineqartassaaq, kisiannili siunertarineqassaaq tamanna sapaatip akunneranit ataatsimit sivisunerussasoq.

## § 17-imut

Aalajangersagaq maannakkut peqqussummi § 23-mik ingerlatitseqqinneruvoq.

## Imm. 1-imut

Aalajangersakkap atuutilerneratigut POST Greenland nassiussanut apuunneqarsinnaanngitsunut nassiussanillu pigisanik apuunneqarsinnaanngitsunut maleruagassanik niuernermit piumasagaatini nalinginnaasuni aalajangersaassaaq. Maleruagassani ilaatigut nassiussat apuunneqarsinnaanngitsutut isigineqartariaqartut qanoq pineqartarnissaat nassuiaatigineqartariaqarput. Nassiussaq tiguisussamut tunniunneqarsinnaanngikkuni apuunneqarsinnaanngitsutut taaneqassaaq, kiisalu siunnersuummi § 10-imut aalajangersakkat naapertorlugit allakkanik ammaanissamut POST Greenlandip tiguisussamik nassiussisumilluunniit nassaarsinnaannginnera piumasarineqarpoq. Nassiussat apuunneqarsinnaannginnerinut tiguneqarnissaannut



itigartitsineq, tiguisussap aallarsimanagera, qaatiguuliornerup naammannginnera, tiguisussap najukkami ilisimaneqannginnera assigisaaluunniit pissutaasinnaavoq.

Imm. 2-mut

Nassiussat nioqqutissanik eqquteqqusaanngitsunik imaqartut imaluunniit imaqartutut ilimagineqartut, taakkunungalalu ilanngullugit nioqqutissat akitsuutillit, akitsuusigassatut pisinnaatitaaffeqarfiunngitsut nioqqutissanik eqqussisarneq annissisarnerlu pillugit Inatsisartut inatsisaat naapertorlugu oqartussaasunut eqqortunut tunniunneqassapput. Taamatut suliaqarnermi nioqqutissat kisermaassisussaataaffigineqartut, soorlu cigaritsit, tupat, viinnit imigassallu aalakoornartullit allakkerivinni ataasiakkaani uninngatinneqassapput oqartussaasullu ilisimatinneqassallutik. Ikiaroomartut pineqartillugit nioqqutissat politiinut tunniunneqassapput.

#### § 18-imut

Aalajangersagaq maannakkut peqqussummi § 24-mik ingerlatitseqqinneruvoq.

Aalajangersakkami aalajangersarneqarpoq, immersukkat allakkat suliarineqarnerini atorineqartut, aammalu frimærkinik nipititsivigineqartut POST Greenlandip pigisarigai. Immersukkat taamaattut nalinginnaasumik poortukkanut adressekortitut ilaatinneqartarput, aammalu POST Greenlandip pappiaqqatut ilumini najoqqutassaatur, assersuutigalugu naammagittaalliortoqarnerani ujarlertoqarneranilu atorineqartussatut isigineqassallutik. Immersukkat taamaattut nassiussamut akiusoq tunngavigalugu frimærkinik nipititsivigineqartarput, nalinginnaasumillu poortugaasarlutik. Frimærkit taakku immersukkaniit peeqqusaanngillat.

#### § 19-imut

Aalajangersagaq maannakkut peqqussummi § 25-mik ingerlatitseqqinneruvoq. Kisiannili imm. 3 erseqqissarneqarpoq. Namminersornerup atuutsinneqalerneru pissutigalugu taaguutinik atuineru allannguisoqarpoq.

Imm. 1-imut

POST Greenland allakkerineru sullissineruut akini aalajangersaasarpoo. Akit tunngaviumik aningaasartuutinik matusisinnaanngorlugit aalajangersarneqartussaapput, taamaalillunilu POST Greenland aningaasaliinernik nalikilliliinernillu pisariaqartinneqartunik naammassisaqarsinnaasussaavoq.

Imm. 2-mut

Poortukkat allakkallu Kalaallit Nunaata iluani, Savalimmiunut Danmarkimulluunniit nassiunneqartussat pineqarpata, Naalakkersuisut akit annertussusaannik akuersisussaapput. POST Greenlandimi Danmark aamma Savalimmiut nunanut allanut (Europa) ilaatinneqartarput, tamatumalu kingunerisaanik Naalakkersuisut aamma Europamut akit annertussusaannik akuersisarput. Najugaqarfiit ataasiakkaat Kalaallit Nunaanni siaruarsimasut nunami sumiiffii taamatullu angissusii assigiinngitsorujussuupput. Taamaattumik akinik pilersitsisarnerit niuernermit suleriaatsit malillugit maleruagassiuussisarnermut tamakkiisumik ilaatinneqalernissaat naleqqutissanngilaq. Naalakkersuisut akinik akuersinissamut periarfissaqarnermik, allakkanik Kalaallit Nunaanni sumiiffinnut tamanut assartuisinnaanermi akit naapertuuttumik akeqartitsilersinnaanermi annertunerulinginnissaat qulakkeertarusuppaat.

Allakkerinikkut sullissinerit tamarmik innuttaasunut nunami sumiiffinni tamani assigiimmik atugassaqartitsiviusumik neqeroorutigineqassapput. Suleriaasiuvoq akit annertussusaat taamaalillunilu allakkanik nassiussinermi akiusut nunami sumiiffiit imaluunniit eqqarsaatigisassat allat tunngavigalugit assigiinngisitaartinneqartaralik. Tamatumunnga aningaasaqarneq, inuiaqatigiit sullitanullu tunngavissanik eqqarsaatigisassanik peqartoq nalilerneqarpat, atugassarititaasussanik allanik atuutsitsisoqalersinnaavoq, soorlu Kalaallit Nunaanni sumiiffiit killeqarfiinut akit agguarneqarsinnaallutik. Tassunga atatillugu oqaatigineqarsinnaavoq, POST Greenland sumiiffinni kisermaassisussaataaffeqarfiginngisaminni pisussaaffilerneqarmat, tamatumalu niuerfimmi namminersortunngorsaaffiusimasumi suliaqarnissaq ajornarnerulersippaa taamaattumillu sumiiffikkaartumik akinik aalajangersaasinnaaneq tunngavississinnaallugu.

2009-mi ukiakkut aviisinik nassiussinermut immikkut ittumik tapiissutit atorunnaarsinniarlugit Naalakkersuisut aalajangerput. Tamatuma kingunerisaanik quppersakkat ullormut, sapaatit akunnerannut aamma qaammammut saqqummersartut akit immikkut atorlugit ingerlanneqarsinnaajunnaarput. Taamaattumik tunisassianut taamaattunut innersuussut immikkut ittoq atuutsiinnarneqanngilaq, ingerlassinissamullu pisussaaffimmut nalinginnaasumut ilaatinneqalerluni.

Imm. 3-mut

Tamanna maleruagassat atuuttut, tassalu nunarsuarmi allakkerinermut isumaqatigiissummi maleruagassat naapertorlugit pisimappat. Tappiitsunut nassiussanut killissarititaasut POST Greenlandip nunarsuarmi allakkerinermut isumaqatigiissummi maleruagassat naapertorlugit aalajangersassavai, nunap iluani tappiitsunut nassiussat nassiunnerini akiliisitsisoqassanngilaq. Tappiitsunut nassiussani tappiitsunut nassiussanut angissusissamut, oqimaassusissamut ilusissamullu piumasaqaatit naammassineqassapput. Piumasaqaatit niuernermit piumasaqaatini nalinginnaasuni tamanit takuneqarsinnaassapput, tak. § 2, imm. 1. Kiisalu allakkerivik tappiitsunut nassiussanik ingerlassinissamut pisussaaffeqartoq erseqqissarneqarpoq, taakkulu tassaapput nassiussat qaatiguuliorsimasut, attaveqaateqarnermi

taamaallat tappiitsunut atugassanik imaqartut. Tappiitsunut nassiussat nassiunneqarsinnaasut tassaapput:

1. Assiliat qattunerusunngortitat imaluunniit naqitat allanneri qattunerusunngortitat (aamma allakkat issuakkallu). Tappiitsunut isigisinnaasunullu nassiunneqarsinnaapput.
2. Pappiaqqat naqinneri qattunerusunngorlugit allannermut atugassiat, Danmarkimi tappiitsunut atuakkanik atorniartarfimmit imaluunniit tappiitsunut isigiarsuttunullu iluaqutissaqarfimmit imaluunniit taakkununga nassiunneqarpata.
3. Nipinut immiussanut atortut, taamaallaat tappiitsunut atugassiatut suliarineqarsimasut, aammalu Danmarkimi tappiitsunut atuakkanik atorniartarfimmit imaluunniit tappiitsunut sullissivinnit suliniaqatigiiffinnillu, imaluunniit taakkununga nassiunneqartut.
4. Kasettebåndit imaluunniit atortut digitaliusut atorlugit immiussat, tappiitsut akornanni nassiussuunneqartut, imaluunniit tappiitsuniit isigisinnaasunut nammineerluni attaveqatigiinnermut atorneqartutut nassiussuunneqartut.
5. Quppersakkat, naqitat atuakkallu kasettebåndinut, cd rom-inut assigisaannullu atuarlugit immiunneqartut, saqqummersitsisussamut utertillugit nassiunneqartut. Saqqummersitsisoq tassaasinnaavoq Danmarkimi tappiitsunut atuakkanik atorniartarfik, Københavnimi meeqqanut tappiitsunut isigiarsuttunullu sullissivik, Kalundborg-imi Synscenter Refnæs, Dansk Blindedsamfund taassumalu immikkoortortai, Kristeligt arbejde blandt Blinde kiisalu Kristeligt Lydbibliotek.

#### § 20-mut

Aalajangersagaq maannakkut peqqussummi § 26-mik ingerlatitseqqinneruvoq.

POST Greenlandip akinik naatsorsueriaatsinut maleruagassat, tassalu akit nunanut immikkoortiterisarnissaat aalajangersartassavai. Akit ilusaat maannakkorpiaq imaapput: Kalaallit Nunaat, Europa nunallu allat, taamaattumillu akit assigiinngitsut atuutsinneqarput. POST Greenlandip frimærkilersueriaasissanut maleruagassat aalajangersartassavai, tassalu frimærkilersuinnermut suut atorneqassanersut (frimærkit imaluunniit naqitsissutit), frimærkinik naqiterinnermut naqiterissutit qanoq atorneqartassanersut aammalu frimærkinik naqitsissutit (Post Pay) atorneqarnissaannik piumasaaqateqartoqassanersoq POST Greenland maleruagassiortassaaq. POST Greenland nassiussinnermut akitsuutinullu akiliutit pillugit maleruagassiortassaaq. Tamatuma nassatarisaanik POST Greenland qaqugukkut nassiussinnermut akiligassanik (frimærkinik) atuisoqassanersoq aammalu qaqugukkut aningaasanngorlugit akiliinnermik atuisoqassanersoq maleruagassiussaaq. Akiligassanut allagartanik akiliinnermi assersuutigalugu akitsuut aningaasanngorlugu akilersinneqartassaaq.

#### § 21-mut

Aalajangersagaq maannakkut peqqussummi § 27-mik ingerlatitseqqinneruvoq.

POST Greenlandip amerlasuukkaaraluni niuertarfinniit frimærkinik tuniniaasarnermut maleruagassat aalajangersassavai, taakkunungalu akikillisaasarnermut maleruagassat, amerlasuukkaaraluni niuertarfiit tuniniagaasa nalingisa minnerpaaffissaannut maleruagassat, frimærkinik ataasiakkaanik tuniniaanermi maleruagassat, atornerluisarnermut maleruagassat, allagartalersuisarnermut maleruagassat il.il. ilaatinneqassapput. Frimærkinik amerlasuukkaaraluni niuertarfinnut maleruagassat suliffeqarfiup iluani malitassatut aalajangersarneqassapput, niuernermit piunasaqaatini tamanit takuneqarsinnaasuni aalajangersarneqaratik.

#### § 22-mut

Aalajangersagaq oqaatsitigut allannguuteqartinneqarluni ilaannakortumik maannakkut peqqussummi § 40-mik ingerlatitseqqinneruvoq. Namminersornerup atuutsinneqalernera pissutigalugu taaguutiniq atuinermi allannguisoqarpoq kiisalu imm. 2-imi allannguisoqarluni.

#### Imm. 1-imut

POST Greenlandip aalajangiineri Naalakkersuisunut maalaarutigineqarsinnaapput. Taamaattorli Naalakkersuisut tamatumunnga killiliisinnaanerannut inatsisitigut tunngavissiisoqarpoq, takuuk imm. 2.

#### Imm. 2-mut

Maalaaruteqartarneq pillugu aalajangersakkanik sukumiisunik aalajangersaasinnaanissamut oqartussaaffik, kiisalu aalajangiinerit ilasa maalaarutigineqarsinnaannginnerinut periarfissiineq Naalakkersuisunut nalunaarusiornikkut aalajangiiffigisassanngorlugu nuunneqarpoq. Maannakkut suleriaasiusut allanngortinneqarnissaat siunertarineqanngilaq. Maannakkut suleriaasiusumi pisuni immikkut ittuni immikkorluinnaq ittumik peqquteqartumik POST Greenlandimiit taarsiissutissanik akiliisoqartarnissaa tunngavigineqarpoq, taamaattumillu aalajangiinerit taakku Naalakkersuisunut maalaarutigineqarsinnaanngillat. Maalaaruteqarsinnaanermi killilersuutiniq allanik atuutsitsisoqanngilaq.

Tamatuma saniatigut maalaaruteqarnissamut piffissarititaasunik, kiisalu kikkut Naalakkersuisunut maalaaruteqarsinnaatitaassanersut pillugu oqartussaaffiup nuunneqarnissaa aalajangerneqarpoq.

#### § 23-mut

Aalajangersagaq maannakkut peqqussummi § 41-mik ilaannakortumik ingerlatitseqqinneruvoq. Tamatuma saniatigut paragrafini innersuussutit sunniutissaat iluarsineqarput. Aalajangersakkat suut pineqaatissiiviusassanersut

allannguuteqartinneqanngilaq. Kalaallit Nunaanni pinerluttulerinermut inatsisip nutaap 1. januar 2010 atuutilernerani aalajangersakkami allannguisoqarpoq, taannalu pinerluttulerinermut inatsisip nutaap imarisaanut assinguvoq.

Imm. 1-imut

§§ 6, 7, 8, 9 aamma 10-mik unioqqutitsisoq Kalaallit Nunaanni pinerluttulerinermut inatsisimmi maleruagassat malillugit akiliisinneqarnissamik pineqaatissinneqarsinnaavoq.

Imm. 2-mut

§§ 3, 6, 10, 12 aamma 22 naapertorlugit peqqussutini unioqqutitsinermut akiliisitsisarnissaq pillugu maleruagassanik peqqussutini aalajangersaasoqarsinnaavoq.

Imm. 3-mut

Peqqussummi siusinnerusukkut atuuttumi § 43, peqqussummi aalajangersakkat inuinnaanngitsunit unioqqutinneqartarnerat pillugu oqaaseqatigiinnik imaqarpoq. Aalajangersagaq taanna maannakkut atorunnaarpoq aammalu pisinnaatitaasut pisussaataasullu pillugit aalajangersakkamik taarserneqarluni.

Inatsisartut inatsisaanni aammalu peqqussutini, Inatsisartut inatsisaat tunngavigalugit suliarineqartuni akiliisitsinissamik pineqaatissiisoqartillugu, inuit pisinnaatitaasut pisussaataasullu Kalaallit Nunaanni pinerluttulerinermut inatsimmi maleruagassat naapertorlugit akiliisussanngortinneqarsinnaasut aalajangersakkami aalajangersarneqarpoq. Inuit pisinnaatitaasut piginnaatitaasullu ilaatigut tassaapput ingerlatseqatigiiffik, peqatigiiffik, suliffeqarfik imminut pigisaq imaluunniit alla inatsisit malillugit pisinnaatitaasut piginnaatitaasutullu isigineqarsinnaasoq, Namminersorlutik Oqartussat, kommuni imaluunniit kommunit suleqatigiiffiat. Pisinnaatitaasunut piginnaatitaasunullu, Namminersorlutik Oqartussanut, kommunimut imaluunniit kommunit suleqatigiiffiannut taamatut akiliisitsisoqarsinnaavoq.

Imm. 4-mut

Aalajangersagaq nutaajuvoq aammalu allannguutitut Kalaallit Nunaanni eqqartuussisarnermik inatsisip nutaap 1. januar 2010-imi atuutilerneraneersunut naapertuulluni.

Imm. 5-mut

Aalajangersagaq nutaajuvoq. Akiliisitsissutit pineqaatissiissutigineqartut inatsit manna malillugu Kalaallit Nunaanni Namminersorlutik Oqartussani Nunap Karsianut tutsinneqassasut aalajangersarneqarpoq.

#### § 24-mut

Aalajangersagaq oqaatsitigut allannguuteqartinneqarluni maannakkut peqqussummi § 7-imik ingerlatitseqqinneruvoq. Namminersornerup atuutsinneqalenera kiisalu namminersorneq pillugu inatsimmi sunniutissanik iluarsisooqarnera pissutigalugit taaguutininik atuinermit allannguisoqarpoq.

Aalajangersakkami aalajangersarneqarpoq Post Danmark A/S-ip nunani tamalaani allakkerinermut suleqateqarnermi POST Greenland-imut sinniisuusinnaasoq.

Tungaviusumik matumani taamaallaat nunarsuarmi allakkeriviit peqatigiiffiat, nunarsuaq tamakkerlugu allakkeriviit akornanni pissutsinut maleruagassanik aalajangersaasartooq pineqarpoq.

#### § 25-mut

Imm. 1-imut

Atuutilernissaanut piffissaliussa q aalajangersarneqarpoq inatsisip Inatsisartunit akuerineqarnerata kingorna piaarnerpaamik atuutsilernissaa siunertaralugu.